

# LAERSKOOL SONOP - GEDRAGSKODE VIR LEERDERS EN OUERS - 2017

Die ouer(s)/voogd(e) van leerders moet toesien dat hulle (hy/sy) aan die begin van die nuwe skooljaar 'n vrywaringsbrief vir ekskursies, toestemming vir die behandeling van 'n beseerde leerder, 'n verklaring insake die gedragkode van leerders en ouers, die skool se selfoonbeleid, sowel as die beleid oor bullebakkerie en kuberbullebakkerie onderteken het. Ouers en voogde moet verder kennis neem van alle beleide wat op die skool se d6-kommunikeerder, webtuiste en alle ander elektroniese media van die skool verskyn.

## OUERS SE ROL

### ALGEMEEN:

1. Neem asseblief deeglik kennis van die skool se gedragkode en moedig u kind aan om dit te onderhou.
2. Verseker u kind se gereelde en stiptelike skoolbywoning.
3. Voer gereeld gesprekke met u kind oor sy/haar skooldag. Kinders het altyd die behoefte om gebeure by die skool met u te deel.
4. Leer u kind se opvoeder ken. 'n Goeie ouer-opvoederverhouding verseker 'n gelukkige kind.
5. Versterk leer tuis deur u kind se huiswerk na te gaan.
6. Wees betrokke deur sy/haar akademiese en buitemuurse aktiwiteite te ondersteun.
7. Luister met 'n oop gemoed na u kind en die opvoeder. Waak daarteen om bevooroordeel te wees en soek altyd na 'n wen-oplossing.
8. Leer u kind(ers) om positiewe oplossings vir probleme wat hulle daagliks in die skool beleef te vind en om konfrontasie sonder geweld te hanteer.
9. Ouers wat die skool besoek moet by die hoofingang inkom, by die sekretaresse aanmeld, die besoekersboek teken en 'n besoekerskaartjie ontvang. Geen ouer mag 'n opvoeder gedurende klastyd of sonder 'n afspraak spreek nie.

### KARAKTERTRANSFORMASIE:

1. Leerders in die grondslagfase (Gr. 1 – 3) moet elke dag die spel met kraletjie/s dra.
2. Die kraletjies (rooi, oranje, groen, blou, pers en geel) bly die eiendom van die skool en verlore kraletjies of spelde moet deur die leerders vervang word teen die bepaalde tarief.
3. Leerders in die intersenfase dra nie kraletjies nie.
4. Skerp asseblief die waarde van karaktertransformasie, wat vir ons skool baie belangrik is, by u kind in.

## BUITEMUURSE BEDRYWIGHEDE / SPORT:

### GEDRAGSKODE VIR OUERS EN ONDERSTEUNERS

1. Moedig asseblief u kind aan om ten minste aan een somer- en wintersport deel te neem. Leerders moet sportoefeninge, gedurende die sportlesuur, getrou bywoon.
2. Maak asseblief verskoning by die afrigter indien u kind nie 'n oefening of wedstryd kan bywoon nie.
3. Die deelname aan skoolsport is primêr opvoedkundig van aard.
4. Om deelname aan te moedig en om leerders toe te rus met sportmanskap, selfdisipline, selfbeheersing en deursettingsvermoë.

### VEREENSELWIG U MET LAERSKOOL SONOP

1. Ouers en toeskouers moet hulself as verteenwoordigers van die skool sien wanneer hul wedstryde bywoon of hul kinders ondersteun.
2. U word aangemoedig om die span waarin u kind speel te ondersteun asook soveel as moontlik van die ander skoolspanne.

### GEDRAG TYDENS WEDSRITYDE

1. Positiewe ondersteuning word op prys gestel.
2. Ouers en ondersteuners word versoek om hulle te weerhou van negatiewe opmerkings of ongehoorde taalgebruik teenoor skeidsregters, ander beampies, spelers of ondersteuners van die opposisie.
3. Ouers en ondersteuners word versoek om die nodige afstand vanaf die kantlyne te handhaaf en nie binne die speelveld of afgemerkte areas te gaan nie.
4. Ouers en ondersteuners word versoek om hulle te hou by die reëls wat vir elke wedstryd of toernooi van toepassing is.
5. Ouers en ondersteuners moet die nodige verdraagsaamheid en respek betoon teenoor medetoekouers en opposisie.
6. Ouers en ondersteuners moet so optree dat hulle altyd die skool se beeld na buite sal uitdra en niks doen wat dit kan skade aandoen nie.

### SPANKEUSE

U word versoek om asseblief nie in te meng met die afrigter/s se spankeuse nie.

Wenke wat met die regte gesindheid bedoel word, kan wel aan afrigters op die regte tyd en plek oorgedra word.

**KOMMUNIKASIEKANALE RAKENDE SPORTAANGELEENTHEDE -**

Ouers en ondersteuners kan enige navrae of probleme opneem met die adjunkthoof of skoolhoof. Probleme kan ook met die betrokke persoon bespreek word, maar asseblief nie langs die veld nie. Ernstige klagtes kan ook met die skoolhoof of Bestuursliggaam opgeneem word.

Ons versoek dat by die gedragkode gehou word, sodat spelers en toeskouers hul sport kan geniet.

**LEERERS****GEDRAG OP DIE SKOOLTERREIN:**

1. Sodra die klok lui aan die begin van 'n skooldag en teen die einde van pouses moet leerders dadelik in hulle rye aantree, stilbly en ophou eet en drink. Wanneer die tweede klok, na twee minute, lui MOET almal stil en rustig in hulle rye staan.  
Laatkommery: by 'n klas, rye, tydens byeenkomste, vergaderings ens. word ten strengste afgekeur.
2. Leerders mag nie die skoolterrein gedurende skoolure sonder toestemming verlaat nie.
3. Leerders mag nie items soos bv. lekkers, ysies ens. van enige persoon buite die skoolterrein of oor die heining koop of ontvang nie.
4. Leerders mag niks by die skool verkoop of daarmee smous nie, behalwe met die toestemming van die skoolhoof.
5. Wanneer 'n leerder afwesig is moet dit per telefoon of brief voor 08:00 aan die sekretaresse gerapporteer word.
6. Wanneer 'n leerder, na afwesigheid, terugkeer skool toe, moet hy/sy 'n verduidelikende brief van die ouers aan die klasopvoeder stuur. Hierdie leerders is verantwoordelik vir die inhaal van verlore klas- en tuiswerk.
7. Daar mag nooit met fietse, motorfietse, rolskaatse, skaatsplanke, ens. op die skoolterrein gery word nie.
8. Leerders mag nie die eiendom van ander leerders neem of beskadig nie. Leerders mag nooit 'n ander leerder se tas of eiendom wegsteek nie, al word dit as 'n grap bedoel.
9. Rekkies word ten strengste verbied, omdat leerders mekaar daarmee skiet. Wanneer 'n plakkaat vir 'n taak skool toe gebring word kan dit met 'n toutjie vasgemaak word i.p.v. 'n rek. Leerders mag nie "pea shooters" skiet; klippe of ander voorwerpe gooi, of met stokke slaan of speel nie.
10. Leerders mag nie hulle skoene gedurende pouses uittrek nie.
11. Leerders mag nie speletjies speel waar klere geskeur word, of waar iemand beseer kan word nie.
12. Raakrugby of ander balspele mag slegs gedurende sekere tye, soos deur die skoolhoof besluit word, gedurende pouses gespeel word. Geen duikrugby of die skop van enige balle word pouses toegelaat nie.
13. Slegs netbal meisies wat doel en verdediger speel mag gedurende pouse doele oefen. Die betrokke afrigter moet hiervoor toestemming gee. Seuns mag nie saam met meisies netbal speel of oefen nie.
14. Hokkiespelers mag nie voor skool of gedurende pouses met hokkiestokke slaan nie. Niemand mag aan die hokkiedoel se raamwerk hang of daarop speel nie.
15. Geen leerder mag gedurende pouses agter die skoolsaal wees nie. Elke graadgroep moet op hulle toegekende areas op die terrein gedurende pouses wees.
16. Geen waardevolle artikels mag skool toe gebring word nie. Die skool aanvaar nie verantwoordelikheid vir waardevolle artikels wat by die skool wegdraak of beskadig word nie.
17. Enige artikel wat opgetel word, moet dadelik by die sekretaresse ingehandig word.
18. Indien 'n leerder enige klagte oor 'n ander leerder het, of sien dat 'n leerder 'n skoolreël oortree, moet dit eers met die klasopvoeder of personeel op terreindiens bespreek word. Leerders mag nie mekaar direk na die skoolhoof se kantoor neem nie.
19. Geen leerder mag enige sigarette, vuurhoutjies of enige ander rookgoed (dagga of bedwelmakende middels) in sy/haar besit hê of om enige rede skool toe bring nie. Rook word ten strengste verbied.
20. Geen pornografiese materiaal of alkohol mag deur 'n leerder op die skoolterrein gebring word nie. Enige leerder wat hierdie reël oortree sal swaar gestraf word.
21. Bakleiery, afknouery, teistering, vloekery, diefstal en die aanhitsing van enige soortgelyke gedrag word ten strengste verbied.
22. Rommelstrooi, breek van plante, krap op mure, beskadiging van toilette of enige vorm van vandalisme word ten strengste verbied.
23. Leerders mag nie oor heinings, hekke of in bome klim nie.
24. Dit is die plig van elke leerder om 'n bydrae te lewer tot die netheid van ons skoolterrein.

**GEDRAG EN OPTREDE BINNE DIE SKOOLGEBOU:**

1. Gedurende saalbyeenkomste word onberispelike gedrag ver wag. Dit is verbode om in die saal, gedurende saalbyeenkomste te eet, praat of te fluister. Gedurende enige optrede in die saal mag daar nie gefluit of geboe word nie.
2. Leerders mag nooit in die saal of skoolgebou hardloop nie. In die gange stap ons altyd stil en in netjiese rye.

3. Leerders mag nooit voor skool of gedurende pouses in die skoolgebou of klaskamers wees nie.
4. Niemand mag ooit in die kleedkamers speel, raas, mekaar natgooi, of hom/haar swak gedra nie.
5. Op reëndae moet leerders stil in die gange sit, staan of loop.
6. Leerders mag nie in 'n klaskamer ingaan sonder die verlot van 'n opvoeder nie.
7. Geen skryfbehoeftes of eiendom van leerders mag na skool in die gange, klasse of onder banke gelos word nie.
8. Indien 'n leerder enige skoolseiendom, bv. 'n Ruit breek, sal sy/haar ouers in kennis gestel word en die skade sal op hulle koste herstel word. Leerders mag ook nooit op skoolbanke, skoolmeubels, vloere, mure, of skoolseiendom krap nie. Indien 'n ander leerder iemand sien wat hierdie reël oortree moet dit dadelik gerapporteer word.
9. Geen kougom word op die skoolterrein toegelaat nie.
10. Moet nooit geld in die klaskamer los nie.
11. Waardevolle artikels moet by die huis gelos word. Indien 'n leerder hierdie reël oortree en 'n waardevolle artikel skool toe bring doen hy/sy dit op eie risiko.
12. Aan die begin van die jaar word alle boeke met plastiek oorgetrek, en indien nodig weer deur die jaar om dit netjies te hou.
13. Leerders wat die skool gedurende die jaar verlaat moet alle skoolseiendom, soos handboeke ens. betyds terugbesorg aan die klasopvoeder.
14. Indien 'n ouer versoek dat 'n leerder om enige rede, (bv. Verkoue) nie aan L.O. mag deelneem of gedurende pouses moet uitgaan nie, moet die ouer 'n briefie ter verduideliking aan die klasopvoeder rig.

### **VOORKOMS EN KLEREDRAG:**

1. Alle leerders woon die skool by in die skooldrag van Laerskool Sonop. Geen hoede, pette of "beanies", warm baadjies of "windbreakers" mag gedra word nie. "Windbreakers" en anderkleurige reënbaadjies mag wel op reëndae gedra word, maar nie in die skoolgebou nie.
2. Nuwe leerders mag vir 'n tydperk, soos deur die skoolhoof besluit, hulle vorige skooldrag aantrek, totdat Sonop se skooldrag aangeskaf is.
3. Baadjies en trui se moue mag nie opgerol word nie. Hemde mag nie uithang en skoene moet vasgebind wees. Geen slordige voorkoms sal geduld word nie. Slegs maroen of swart handskoene mag op koue dae gedra word.
4. Seuns moet 'n skoolhemp dra wat die skoolwapen op die sak het. Dit is veral belangrik gedurende die somermaande wanneer 'n trui of baadjie nie gedra word nie. Hierdie skoolwapens is by die skool beskikbaar.
5. Vir seuns word slegs swart, toerygskoene met vetters en sonder patrone as skooldrag aanvaar. Skoolskoene se vetters moet te alle tye vasgebind wees en mag onder geen omstandighede los wees en langs die kante van hul skoene ingesteeek word nie.
6. Seuns dra grys, lang kouse met die skoolkleure daarop.
7. Vir die meisies word swart skoene met 'n oorlagbandjie of wat toeryg as skooldrag aanvaar.
8. Indien 'n leerder se skoene stukkend raak mag hy/sy met die skoolhoof se toestemming, vir 'n beperkte tyd, die skool bywoon met ander skoene.
9. Alle klere en besittings moet duidelik gemerk wees, veral skoolbaadjies en -trui.
10. Leerders wat op opvoedkundige uitstappies gaan moet in skooldrag geklee wees, behalwe as die klasopvoeder anders reël.
11. Geen ornamente soos ringe, hangertjies, kettings ens. mag gedra word nie. GEEN armbande word toegelaat nie.
12. Meisies mag een ringetjie of knoppie aan die oorbel van elke oor dra. (slegs goud of silwer)
13. Seuns mag geen oorbelle dra nie.
14. Geen leerder se hare mag gekleur word nie.
15. Seuns se hare mag nie langer as die ore of kraag van die hemp wees nie. Seuns se hare mag net in 'n standaardsnit gesny wees. Geen vreemde, uitspattige snitte is toelaatbaar nie.
16. Meisies se hare moet netjies vas wees met 'n maroen lint, "alice band" of rekkie. Indien maroen moeilik verkrygbaar is, is swart ook aanvaarbaar. Sodra 'n dogter se kuif langer as die wenkbroue is, moet dit vasgebind word en nie agter die ore ingehak word nie.
17. Leerders mag nie tatoeëermerke of ander tekeninge op hulle liggame hê nie.
18. Naels moet netjies geknip wees en geen naellak of enige ander grimering word toegelaat nie.

### **BUITEMUURSE BEDRYWIGHEDE:**

1. By Laerskool Sonop word elkeen op die sportveld verbind tot:
  - Integriteit
  - Die ontwikkeling van die sport waaraan jy deel is.
  - Sportmanskap en positiewe gesindheid.
  - Verantwoordelikheid teenoor jou spanlede, ouers, afrigters en borge.
2. Elkeen het die reg om sport te geniet in 'n veilige en behoorlike gestruktureerde omgewing.
  - Daar moet te alle tye by die voorgeskrewe ouderdomsgroepe gehou word om spelers teen beserings en invloed van ouer leerders te beskerm.
  - Die hoogste vorm van sportmanskap moet te alle tye gehandhaaf word.
  - Leerders moet altyd in die korrekte sportdrag geklee wees vir wedstryde.

- Spelers moet hul eie besittings en die skool se toerusting met die nodige respek behandel en in stand hou (oppas ).
- Spelers moet verantwoordelikheid vir hul optrede aanvaar en hulle hou by die reëls vir elke sportsoort.

3. Elkeen het die reg om beleefd en met respek behandel te word en die verantwoordelikheid om dit waardig te wees.

- Spelers moet hulle verbind tot hofflikheid en verantwoordelikheid wat die waardes en standaarde van Laerskool Sonop sal uitdra.
- Onberispelike gedrag en taalgebruik word te alle tye ver wag.

#### **SKOOLTASSE:**

1. Slegs tradisionele skooltasse word toegelaat. (Maroen, groen en swart )
2. Geen tas met handelsname, bv. Billabong ens. word toegelaat nie.

#### **HANDBOEKE**

1. Ouers en leerders moet mede-verantwoordelikheid vir handboeke aanvaar.
2. Alle moontlike voorsorgmaatreëls moet getref word om die lewensduurte van handboeke te verleng.
3. Handboeke moet asseblief netjies met plastiek oorgetrek word. Leerders mag onder geen omstandighede met pen in handboeke skryf nie.
4. Verlore handboeke en handboeke wat opsetlik beskadig word sal teen die aankoopprys vervang moet word.

#### **SELFONE**

1. Sien asseblief die selffoonbeleid waarvoor u aan die begin van die nuwe skooljaar geteken het. Selfone moet verkieslik by die huis gelos word.

#### **ALGEMENE REËLS**

1. Die volgende leerderoortredings word ten strengste verbied:
  - Rassistiese, seksistiese en diskriminerende opmerkings en gedrag.
  - Bedrog, soos vervalsing van dokumente, eksamenbedrog ens.
  - Besit en verspreiding van pornografiese of rassistiese materiaal; of die kyk en/of aflaai daarvan op enige rekenaar of selfoon by die skool.
  - Seksuele misbruik (teistering van medeleerders)
  - Seksuele wangedrag (soos ontbloting)
  - Dreig van medeleerders of opvoeders
  - Betrokkenheid by bendeverwante aktiwiteite.
  - Besit van gevaarlike wapens soos messe, "knuckle busters", skerppunt skêre ens.
  - Besit van dwelms.
2. Daar word ver wag dat leerders ons skool se naam ook buite die skoolterrein sal hoog hou.
3. 'n Leerder wat skuldig bevind word in 'n kriminele hof sal onmiddellike uitsetting in die gesig staar.
4. Die skoolbanier en landsvlag moet deur elke leerder met die nodige eerbetoon behandel word.
5. Noue skakeling tussen ouers en opvoeders moet plaasvind. Ouers sal dadelik in kennis gestel word wanneer 'n leerder hom \ haar herhaaldelik swak gedra in die klas, op die speelgrond of in enige skoolverband. Detensie sal volg.
6. Herhaalde oortredings van die gedragskode sal lei tot 'n dissiplinêre verhoor deur die tugkomitee.
7. Daar word van elke leerder ver wag om te alle tye die skool se erekode te eerbiedig en NIKS TE DOEN WAT LAERSKOOLO SONOP SE NAAM ONEER SAL AANDOEN NIE.

---

T.F. STRYDOM  
SKOOLHOOF

2017-01-11